

Marlon Croes di DOW

Despues cu Green Corridor ta cla gobierno ta paga

ORANJESTAD – Marlon Croes di DOW a reuni cu formado di gobierno, Sr. Mike Eman y a pasa dor di e inventarisacion pa loke ta e diferente proyectonan cu ta pendiente. Green Corridor y Ringweg 3, ta e dos proyectonan grandi, hunto cu e mudamento di e terminal di waf, cu a papia riba dje ultimamente.

GOBIERNO TA PAGA DESPUES

Segun Marlon Croes cerca e proyectonan di Linear Park 1 y Caya Grandi ta un destaho publico cu a tuma luga den e forma tradicional y e PPP (Public Private Partnership) Green Corridor, ta un proyecto cu tin un otro tipo di destaho. E contracto mes ta caminda gobierno di Aruba ta distancia su mes y e riesgonan di diseño, construccion, financiamiento, y tambe mantencion. Esey ta trece cun'e cu a traspasa diferente riesgo pa sector priva y e contract cu tin traha ta defini cu ora e caminda ta cla, gobierno ta paga despues. Na e momento cu cuminsa construi nan no ta haya ningun pago for di Gobierno te dia cu certifica cu e caminda ta cla. Esey



ta e incentivo di mas grandi pa e sector priva e ora ey pa paga cu e proyecto mas lihe, pa e por cuminsa haya su placa. Si e contratista faya, e banco cu a financi'e ta esun cu ta bay controla e contratista pa e ta na ora, riba schedule, pa e calidad cu e tin cu entrega pa e por haya su placa. Esey ta e otro mecanismo cu ta tuma luga, segun Marlon Croes.

E TEAM

Durante di reunion cu formado, a presenta e team di tanto Green Corridor como di esun di Ringweg. Como lider di proyecto di Green Corri-

dor ta Gisella Wernet. Swinda Dijkhoff como e consehero tecnico di Green Corridor. Tin tambe como consehero di transaccion PWC ta for di sector priva.

Semper y cuando mester tin den un proyecto grandi asina aki un consehero di transaccion di sector priva pa asina refleha integridad, transparencia y obhetividad di e proyecto.

Tin for di Hulanda, Marcel Volkenburg cu ta hurista y ta guiando e team den e proceso den e parti di contract y

maneho di destaho. Tin tambe e abogado Sjiem Fat, kende a yuda den e proceso y pa e team di Watty Vos Boulevard/Ringweg 3 ta practicamente e mesun team. Dijkhoff di DOW ta e lider di proyecto y Paul Kemph ta e consehero tecnico. Esey ta e team cu a traha riba e proyecto aki, Marlon Croes a splica.

TRAHADONAN LOCAL LO PARTICIPA

Segun Croes, e proyecto di e magnitud aki lo tuma luga pa prome biaha na Aruba, pa loke ta e Asociacion di Priva y Gubernamental (PPP). E conocimiento pa por traha un proyecto asina y mantene un periodo di 18 pa 20 aña, ta un conocimiento cu no ta na Aruba awor aki. Companianan di exterior lo participa y naturalmente ora cu nan bin establece na Aruba, nan lo haci uzo di contratistanan local. Esaki a wordo pidi den documentonan cu a keda intercambia. E conocimiento aki, tanto riba aspectonan legal y financiero, ta wordo acumula den su totalidad na Aruba na e momentonan aki, segun Marlon Croes di DOW. □